

皇明大政紀

皇明大政紀卷之十

臣豐城雷禮謹輯

餘姚朱錦謹校

金谿閔師孔謹訂

巳酉宣德四年正月戊申朔

勅賜文武節假二十日軍民如故事張燈兵馬弛夜禁

元宵召羣臣悉赴御苑觀燈

免宣府歲辦薪炭

宣府十七衛所歲辦薪炭給京師上聞之言邊軍豈

應重困命行在工部免之

勅南京都察院左副都御史邵玘考察御史

時南京諸司緩弛御史尤多貪縱效尤成風賦穢狼籍至是玘奉勅考察奏黜不肖御史三十餘人紀綱大振與北院顧佐齊名風紀爲之一清

己巳上在齊宮召大學士楊溥以有過直言諭勉之

上曰比年臣下好進諛詞令人厭之卿宜輔朕於善道溥曰臣荷國厚恩敢忘報稱上曰但覺朕有過舉直言無隱是卽爲報矣溥頓首曰自古直言非難而容受直言爲難陛下樂聞直言臣等敢不盡心

壬申諭吏部侍郎郭璉自今內外大小職事有缺皆須早除勿致廢事

時浙江布政司奏缺官一百一十員故諭之

甲戌勅三法司今後官吏軍民人等除罪大惡極寘之重典理不容恤其誑誤干連於法難免而情實可矜者酌量第等悉令北京納米贖罪

二月癸未勅中府太師英國公張輔左府左都督張昇各輟府事官職俸祿悉如舊

丁亥工部侍郎羅汝敬等使交趾還黎利及耆老遣頭目阿栗等貢方物并代身金人

表奏謹欽遵 聖諭訪求陳氏子孫無有遺者蒙索所留官吏軍人及其家屬卽差人四處尋訪但有遺留盡應起送又奏幼女年九歲係內官馬騏帶回乞赦回以全臣父子之情

已丑南京守備襄城伯李隆獻騶虞二。出滁州來安縣石  
固山禮部尚書胡濙請上表賀不許。

上曰。禎祥之興。必有實德。庶幾副之。朕嗣位今四年。中  
外所任。豈皆得人。農畝豈皆有收。民生豈皆得所。朕夙  
夜不遑。寧處騶虞之祥。於德弗類。況天道無常。理亂之  
幾。恒相倚伏。豈可不慮。唐太宗嘗曰。人君須至公理天  
下。堯舜在上。百姓敬之。如神明。愛之。如父母。動作興事。  
人皆樂之。發號施令。人皆悅之。是大祥瑞。此亦名言。朕  
與卿等。宜共謹之。遂免賀。

乙未戶部尚書郭敦秦請申明洪武永樂年間屯田之例  
從之。

奏擬在京在外衛所下屯之數不問正軍老幼餘丁必依舊額補數令其屯種在外屬衛令三司委堂上官在京并直隸衛所從都察院委御史提督巡視至秋成依例比較賞罰庶倉有糧儲軍無缺食

諭禮部尚書胡濙揭榜申明內外官員服飾儀從序立及尊卑稱呼定制使無僭越

丁酉勅諭三法司但犯不孝及烝父妾收兄弟之妻爲妻凡敗倫傷化者在外有司毋擅斷決悉令送京師如律究治若武官及其子弟有犯者不許復職承襲永爲定例命吏部左侍郎黃宗載清理浙江軍政

吏部奏六科給事中駁出河南浙江等布政司及諸府縣

并土官等官衙門奏本字有洗補錯謬者皆屬不敬應逮  
問上以治文書者之罪姑免問

上與侍臣論夢卜求賢之說

上歎曰君臣相遇豈偶然哉高宗恭默思道渴想賢輔  
而說築傅巖不能自達一旦得於夢寐間誠千載奇遇  
由此觀之人君誠心求賢固無不得之理文王因田獵  
遇太公亦猶此也水流濕火就燥雲從龍風從虎物皆  
有相感之理況一代君臣乎蓋天佑國家必生賢輔高  
宗求賢之心蓋有格于天矣又曰有高宗之心然後可  
以夢告有傳說之賢然後可以爲相若漢文以夢得鄧  
通光武以識用王梁豈不誤哉

降漢府教授曹彥昌爲廣東高要典史

彥昌在府先以丁憂去後高煦敗服闋遂不起吏部移文促之始至侍郎郭璉奏彥昌在外久雖先事去亦當坐以同謀之罪上曰一時同預起事今尚有釋之者矧其先事去乎不聞漢窮治楚獄濫及無辜乎彥昌但治其服闋不起降一等

兵部尚書張本奏驛馬禁例從之

本奏驛馬之設本以飛報軍情今在外凡有符驗官司及鎮守官每以常事泛濫及驛皆宜禁止請今年終各具一歲給驛起數及所幹事務所差人員造冊奏聞以憑稽考又凡遣人賁送勅書例與雙馬及回仍前關給



此皆虛費請給一驢若賫勅人有事回奏者可與一馬  
壬寅陝西鞏昌知府孫亶昌黎知縣楊僖俱九年考滿者  
老乞留命各加俸二級令復任

寧夏總兵寧陽侯陳懋進玄兔白兔各一賜蟒衣玉帶  
三月辛亥右都御史顧佐劾巡按淮安御史顧達酣酒廢  
事爲通判何正所辱命改用之

右都御史顧佐劾蘇州衛千戶朱毓妄陳獲強盜求陞賞  
請治其罪命兵部懲之

乙丑命少師蹇義少保夏原吉凡禮部等衙門遇大事會  
議如故

義等蒙恩優待不親部事而國家決大事定大議仍令

會議。

甲戌遣禮部侍郎李琦等再使安南。仍諭黎利再訪陳氏子孫。如實無。朝廷當與處置。

免四川茶戶徭役。

時四川江安縣茶戶訴舊有茶八萬餘株。年深枯朽。戶丁亦多歿亡。今存者皆給役於官。無力培植。積欠茶課七千七百餘斤。郡縣責徵日急。乞賜減免。并除雜役。得專辦茶課。庶無逋負。通政司以聞。上諭尚書郭敦曰。茶之利蜀人資之。不但爲公家之用。今有司加以他役者。悉免之。宋陳恕爲三司使。稍增茶課。當時非之。此事今任於卿。歲額決不可增。虛耗則當減免。並宜從寬。

四月丙子寧王權奏祿米不當定品級語多忿戾。上引祖制復之。

大略謂祖訓語郡王子孫自鎮國將軍以至奉國中尉遞有品級。洪武二十九年十二月欽定靖江世子與郡王公侯文武官相見禮儀或答拜或坐受遇之於塗或分道讓左或引馬側立各隨品級等第別無行君臣禮之說若必如所云行君臣之禮是教子孫越禮犯分不知有君矣若羣臣與靖江府將軍前皆行君臣之禮是天下紛紛多君也。

上虞縣人李志道充楚雄衛軍死而無繼止有孫宗侃已先鄉試中式兵部尚書張本請依洪武中石堅事例開其

軍伍俾讀書會試自效從之。

上曰祖宗立法如此。正以作士氣。成賢才。朕承舊制。又何急於一卒之用乎。

寧夏守臣復進玄兔。大學士楊士奇進瑞應詩。

初春二月已進。至是復進。

山西代州儒學署訓導事舉人曹鼐上言。臣少年學問未充。不堪爲人師。願就太學讀書。或授別職。亦得自效。命吏部改江西泰和典史。

上謂吏部曰。凡人不自信滿者。其志可嘉。可授縣幕。俾習知民事。如有餘力。亦可進學。

甲申。上御便殿。與侍臣論漢武帝。唐玄宗治亂之由。

上問漢唐諸君在位孰久對曰漢之武帝唐之玄宗皆在位久。上曰漢武好大喜功海內虛耗末年能懲前過玄宗初政有貞觀之風久而恣慾踈忠任邪遂致禍亂竄身失國武帝猶爲彼善於此又曰善心生則明慾心生則闇武帝以田千秋爲賢玄宗以李林甫爲賢此治亂所由異也。

乙酉兵部尚書張本奏舉前刑部員外郎徐琦職方司辦事人才陳孜乞授本部屬官。上命琦爲職方員外郎孜爲職方主事。

上謂吏部曰近來人才未便與六品京官但張本廉謹所舉必當故從之。他有舉者必會官考試然後量授以

職。

戊子命工部尚書黃福同平江伯陳瑄經畧漕運。

上以軍民每歲漕運勞苦欲少蘇其力使歲運不乏故命福與瑄議何處置倉收貯或不必置倉如舊務公私兩便仍行禁下人毋肆擾害。

徙隆慶州永寧縣黑峪巡檢司於紅門。

時御史王聰言黑峪口已置官軍戍守其西南三十里有紅門口正當居庸關北天壽山之後有路通昌平軍民逃逸者皆由此請移黑峪山巡檢司於紅門口爲便遂從之。

命吏部左侍郎黃宗載往湖湘採宮殿大材。

丁酉南京進鱔魚。早薦奉先殿獻。

皇太后

上御文華殿召大學士楊士奇楊榮金幼孜賜鱔魚加賜御製詩。

詩有樂有嘉魚之句。士奇等霑醉獻和章。上喜曰朕與卿皆當以成周君臣自勉。庶幾不忝祖宗之付託。工部尚書吳中請修山西圓果寺塔。不許。

中奏本寺是古蹟道場爲國祝釐之所舊塔損壞乞役民爲之。上曰卿欲藉此求福乎。朕以安民爲福請止之勿勞吾民。

五月己酉永清縣奏蝗蝻生。命戶部遣人督捕。

上問左右曰永清有蝗未知他縣何似。錦衣衛指揮李

順對曰。今四郊禾黍皆茂。獨聞永清偶有蝗耳。上曰。蝗生必滋蔓。不可謂偶有。命行在戶部速遣人馳往督捕。若滋蔓卽馳驛來聞。

壬子謫御史楊居正。司鐸牟倫雷恭。胡曄潘舉充軍遼東。初顧佐劾御史嚴暄等與馬暄等貪淫無恥。已發遼東充吏。居正等以公差出外。至是還。當發吏而妄奏冤抑。上謂行在吏部曰。彼貪淫無恥。尚敢妄訴以冀苟免。俱發遼東各衛充軍。其先發充吏者悉如之。

丁巳與寧王權書。撥田無例不許。

書曰。戶部言灌城田共一千六百一十七頃六十餘畝。鄉民所賴以足衣食。別無荒閑之地。況庶子郡王自有



歲祿稽之。祖訓亦無撥賜田土之例。若從叔祖之言。百姓失業。必歸怨朝廷。亦必歸怨叔祖矣。今叔祖爲諸王表率。使諸王皆倣叔祖之言。不皆違祖訓而損盛德。故撥田之諭不能曲從。惟叔祖亮之。

乙丑。上與侍臣論聽言以理爲主。

有建言治道而泛濫無實者。上以示侍臣。因論爲治之要。侍臣對曰。爲政在人。知人爲要。上曰。知人固難。然臨事聽言之際。以理爲主。君子小人亦可辨。人臣有愛君之心。隨事規正。以利國家。此君子也。若不念君德。不恤國家。阿意曲從。以求容悅。此小人也。侍臣對曰。知人固難。言有似是而實非者。上曰。然。豈獨言哉。於行

亦然。少正卯是已。

已已諭六部都察院。自今當洗心悔過。不許差人假公營私。擾吾良民。違者罪之。仍令巡按御史及按察司察舉不察舉者罪同。

上曰。比聞中外奸弊紛然。嗟怨盈路。皆由爾等不體朕心。凡朝廷科買一物。輒差數人促辦。所差之人。又各有亡賴十數。爲之鷹犬。百倍科徵。民被箠楚。不勝其毒。百分之一歸官。餘皆入於私室。人之困苦。罔所訴告。爾等非不知之。蓋實縱其所爲。風憲耳目。非不聞之。亦略不糾舉。此豈仁人君子之心哉。

辛未。寧化王濟煥奏婚禮在邇。乞免大同備禦官軍三百。

餘人歸以備使令不許

上曰大同當極邊虜寇出沒衝要之路各郡王府皆有官軍守備故太原一路得以無虞若從所言罷歸則別府亦援例來言難於處置矣

兵科給事中戴弁奏自山海至薊州守關軍萬人列營二十二所操練之外無他差遣稍屯種亦可實邊請取勘營所附近荒田斟酌分給且屯且守實爲兩便上嘉納之命戶部同兵部各遣官與都督陳景先經理

癸酉諭兵部出榜禁約陝西河南諸處驛路凡差遣往來恃勢考掠多索供應夫馬車輛并福建等處違例欲乘輜者令巡按御史及按察司具實奏來

命工部尚書吳中申飭郡縣務及時修築陂池堤堰慢令者罪之

因福清縣民奏縣之先賢里官民因百餘頃舊堤六百餘丈以障海水因堤廢田荒永樂中縣民嘗奏請築堤工部移文令農隙用工至今有司未曾興築上命工部責有司修築故通行之

上御文華殿讀典謨有感成詩示廷臣

詩內云盛治已如此端拱已無爲猶聞謹天戒兢業恒自持又云惟爾卿大夫國家所倚毗進賢獻忠讜竭力殫猷爲又云斯言出誠悃勉旃爾勿違當續明良歌毋取伐檀譏蓋示交修之義云

皇明大政紀 卷一  
六月丁丑寧王權因上引太祖禮儀自知鎮國將軍  
以下不應分品級之言爲非具奏悔過上以不用芥蒂  
于心復之

諭工部尚書吳中湖廣災甚採辦竹木痛與裁省

諭曰去歲各處薄收湖廣爲甚其民艱難所宜寬恤比  
聞工部採辦木竹科買諸物動以萬計何得不爲國家  
愛惜民力而勞擾如此宜斟酌事之輕重緩急痛與裁  
省果是緊要合用之物則令管辦餘不急之事俟民力  
從容以漸爲之寬一分則民受一分之賜卿等宜體朕  
意

辛卯賜勅獎諭兵部尚書張本清理軍伍致誠竭慮措置

有方。積弊頓革。奸頑莫容。

壬辰。命太子太師致仕郭資掌戶部事。

甲午。命法司文職官有犯贓罪者。俱依律科斷。

比年因營建。官吏有犯不問輕重。皆令運磚完日。雜犯死罪爲民徒流降用。上謂吏部郭璉曰。例者所以權一時之宜。豈可常行。若久行之。使貪污者益肆其志。廉公者無以激勸。豈可乎。今後文職官吏犯贓罪。俱依律。仍命諭法司知之。

庚子。戶部尚書郭資。同六部都察院堂上官。六科給事中。會議漕運事宜。從之。

工部尚書黃福。同平江伯陳瑄。言宜令江西湖廣浙江

之民運糧一百五十萬石貯淮安倉。蘇松寧國池廬安慶廣德民運糧二百五十萬石貯徐州倉。應天鎮江常州太平淮安揚州鳳陽及滁和徐三州民運糧一百五十萬石貯臨清倉。山東河南北直隸府州縣糧俱令運赴北京倉爲便。於是各官會議除淮安倉收貯及河南山東北京郡縣糧如瑄所言外。會計徐州倉可增糧二十四萬石。臨清倉可增七十餘萬石。其官軍差遣者令各衛撥補。并預定空閑倉廩。增置斗斛。江南民船量地遠近抽摘。及濬河修閘。俱依瑄所奏。

七月丁未。兵部尚書張本奏置驛馬勘合。從之。

時本奏北京操備官軍。請置勘合。發北京行太僕寺收

掌馬每官馬一匹給勘合一道填寫齒色年月日轉發五軍各衛并管隊者付領馬之人執以爲憑遇倒死等項備由陳告就勘合註寫明白限十日內親送北京行太僕寺比較應償者追視齒色附簿開註勘合與馬如前收領再有事故償給如例如領馬人有故馬與勘合從所管別付人收領如此人難欺蔽馬無侵損  
壬子戶部上戶口登耗之數上語侍臣以隋文帝勤政節儉足致富庶不徒以法

上曰隋文帝戶口繁殖財賦充足自漢以來皆莫能及議者以在當世必有良法其後世因其享國不永故無取焉此未必然夫法存乎人理財國之大務若漢唐初



間立法未嘗不善。至其子孫。或恃富厚。力役頻興。費用無度。天下不能不凋蔽。若隋文克勤政事。自奉儉薄。足致富庶。豈徒以其法哉。秦法多非先王之制。後世猶有存者。亦未嘗計其享國長短也。大抵人君恭儉。國家無事。則生齒日繁。財賦自然充足。又曰。天下富庶。致理之本。民物凋耗。兆亂之階。使煬帝不縱其奢慾。能謹守隋文之業。安得遽至敗亡哉。

金吾左衛將軍李春奏。管隊指揮張三。未經奏請。擅收將軍令帶刀入直。上命都察院同錦衣衛鞠之。

諭曰。將軍侍朕左右。最係切要之人。非經兵部奏請。誰敢擅收。唐太宗時。長孫無忌入閣。忘解佩刀。以勲親得。

免。今此輩何人。擅令帶刀在朕左右。必審問誰所指使。縱是公侯大臣亦不貸。

丙辰。廣東海陽縣進白鳥二。禮部尚書胡濙請率群臣上表賀。不許。

上曰。祇敬祖宗恭養聖母。皆職分當然。何賀之有。感瑞之云。良增慚愧。朕夙夜祇念祖宗付託之重。懼弗勝負荷。惟賴爾文武羣臣同心同德。贊輔不逮。溢美虛詞。非所樂聞。其止勿賀。

己未。車駕幸文淵閣。與少傅楊士奇。太子少傅楊榮。論經史。咨政務。悉召諸學士及史官。諭國史宜詳。賜鈔有差。甲子。謫廣東道御史沈潤充軍遼東。

初潤受土豪黃金五兩白金五兩文綺十匹出其殺人  
死罪事覺上命行在三法司鞫之潤伏罪法司奏律  
應絞但事在赦前應杖上曰御史朝廷耳目受重賂  
縱死罪是耳目蔽矣豈可輕貸其免杖發戍遼東邊衛  
丙寅給事中賈諒張居傑劾奏戶部郎中蕭翔等不理職  
務惟日挾妓酣飲放恣命下之獄

上謂夏原吉曰飲酒人之常情朕未嘗禁但君子當以  
廉恥相尚娼優賤人豈宜狎近頗聞此風盛行如劉觀  
輩尤甚每赴人邀請輒以妓自隨故此輩倣效若流而  
不返豈不大壞禮俗大臣者小臣之表也卿等以朕此  
言徧諭之

庚午。宥劉觀死罪。謫其子輻充軍遼東。令觀隨輻閑住。觀既承伏法。司坐觀重法。以輻同犯免科。具奏。上召士奇。榮以奏示之。且曰。觀負朝廷。處重非過。士奇對曰。觀誠有罪。但經事四朝。數受顯任。願姑屈法全其生。榮曰。亦乞貸之。上曰。爲汝二人曲貸其死。發爲邊吏。榮曰。辱之過甚。與死等耳。上曰。欲父子皆貸乎。榮曰。子發戍邊。而令觀隨居。恩與法兩盡矣。遂令法司發遼東。八月。癸未。兵部奏勾軍條例從之。

先是遣官清理軍伍。定例十九條。至是復增例二十二條。通前奏請頒行。

丁未。諭六科給事中。無失政廢事。

諭錦衣衛指揮鎮撫及千戶百戶毋泄漏機務走透獄情以紀綱等殺身亡家爲戒如合不悛國有常憲不貸庚寅贈兵部尚書陳洽少保諡節愍官其子爲刑科給事中。

辛卯 上與侍臣論用兵

上曰古之用兵者卿等試言一二侍臣對曰昔趙括自少學兵自以天下莫能當及爲將以四十萬衆敗於秦此不知合變曹操得孫武之術及其破荊州反驅北方人遠涉江湖以八十萬衆敗於吳此驕之過諸葛孔明知古陳法以爲足以取天下然相持數年魏人不敢決戰而孔明亦不能成功用古法之誠難矣上曰霍去

病不學孫吳而伐匈奴功常居多。由是觀之用兵制勝方畧存乎人。又不在拘古法也。上又曰兵法世稱孫武武止於疆霸曹操亦終不能取吳蜀所謂桓文之節制不能敵湯武之仁義者是也。

河南右布政使蕭省身卒。

省身江西泰和人。廉介自執。預修永樂大典。由刑部主事。超陞河南右布政使。時河南頻歲旱蝗。省身竭力寬恤。盡瘁而卒。君子惜之。

順天府奏鄉試中式舉人王堂等。應天府奏取中式舉人沈諲等八十名。

內閣學士楊溥丁母憂。尋起復。直弘文閣。

九月丙午遼東總兵都督王凱奏海西野人數入寇請發兵致討。上命遣勅戒諭不從而後誅之。

戊申鎮守甘肅太監王安奏請買彩色三梭布十三萬疋市馬戶部請市蘇松二府。上命止於京庫減半支去。

上曰近來稍有買辦州縣假公營私百倍擾民方欲禁革此弊豈可復擾之。

辛亥命平陽王濟煊建家廟。

癸丑兵部奏請自今內外衛分所旗軍有犯偷盜等罪及強盜家屬二次逃軍與軍民官吏人等該充軍者各照南北地方發遣。上命在外者止於附近衛所收操逃軍則令還原衛。

甲寅令南北兩京國子監生年十五以上學無成效及老疾者姚哲等二百五十三人還鄉爲民。

山東按察司僉事李涵抑買民貨爲副使童貞所劾。命罷爲民。

上曰風憲不務操守是不知恥無恥之人豈可用。

乙卯命吏部自今國子監博士助教考滿稱職者必陞用生員亦令兼習書算。

時助教王仙建言上曰其言有理命部行之。

丁巳山西萬泉縣丞王琦奏本縣旱飢稅糧無收。命戶部量免其租稅。

壬戌巡按山東御史包懷德言四事。命禮部會議。



一請於曹莊驛東湯池設一衛七站各設千戶所置軍半護行者半屯田一請開武科一請令兵部取勘合處旗軍不及八十人者處補之一請移撫順通運所與驛並置。

命戶部申明栽種桑棗舊令務求成效毋事虛文。

時有建言洪武中命天下栽種桑棗今民之無知者砍伐殆盡存者亦多枯瘁有司不督民更栽以致民無所資乞令郡縣督民以時栽種仍遣官巡視上曰古人宅不毛者罰布祖宗養民意甚至故申明之。

巡撫蘇杭諸郡大理卿胡聚請修唐陸贄宋范仲淹胡瑗魏了翁祀廟書院從之。

廣西總兵山雲出兵討柳潯二府蠻賊平之。  
遣將出塞燒荒。

十月庚辰。聖駕幸文淵閣。

文淵閣在奉天門東廡。深嚴禁密。故事不得舉火。閣老  
退食於外。上命於庭中隙地置庖。自是得會食中堂。  
丁亥。駕再幸文淵閣。命增直宇。設飲饌器用。翌日。大學  
士楊士奇等上表謝恩。降勅賜詩褒答。

勅曰。朕念卿等弼亮之勤。昕夕弗置。間因暇日至文淵  
閣。微有賜賚。以庶幾乎君臣相與之義而已。而卿等乃  
以表來謝。覽之備悉衷誠。深用爾嘉。因賦一詩以識予  
懷。詩曰。天命予躬。撫萬方。丹心切切。慕虞唐。退朝館

閣咨詢處。回看文星爛有光。

改大學士張瑛爲南京禮部尚書。陳山專授小內史書。

上於左順門遙見大學士陳山。上曰。汝試言山爲人

楊士奇對曰。君父有問。不敢不盡誠以對。山雖侍從

陛下久。然其人寡學多慾而昧于大體。非君子也。上

曰。然。趙王事幾爲所誤。朕已甚薄之。近聞渠於諸司日

有干求不厭。當不令溷內閣也。蓋上初臨御。以山及

張瑛東宮舊臣。俱陞內閣視事。二人行相類。至是浸聞

於上。數日後有旨調瑛南京禮部。山專教內豎。俱罷內

閣之任。朝士皆頌。上明決。山遂見疎。不復近展前矣。

楊萬刺國遣使貢麒麟。羣臣奉表賀太平之瑞。上以豐

年得賢爲瑞。他不與焉。諡之。

甲午。帝巡近郊閱武。

戊戌。帝還京。

常州府同知張宗璉因清軍御史於軍戶絕者取同姓人酷刑逼承。力辨受詬辱。憤鬱疽發背死。邑民哭送。立祠江陰之君山。

平江伯陳瑄奏請置南陽梁家師家仲家等淺閘。并濬徂徠諸山壅塞。泉流從之。

十一月。奸吏奏右都御史顧佐受阜隸賂放歸。命佐自治之。

吏有遭佐撻之者。捃佐之過。謂受阜隸賂放歸。悉具姓

名訴通政司以聞。上密以示楊士奇。且曰爾不舉佐廉乎。對曰所訴之事誠有。非誣。蓋今朝臣月俸止給米一石。薪炭馬芻咸資於皁。不得不遣半歸使備所用。皁亦皆樂得歸耕。實官皁兩便。此京師大小臣僚皆然。臣亦然。自永樂以來如此。仁宗皇帝固知之。所以增朝臣之俸。上歎曰朝臣之艱如此。因怒訴者。曰朝廷用一好人。輒爲小人所排。欲下法司治之。士奇對曰此末事。不足以上干聖怒。但付佐自治。恩與法並行矣。士奇退。上召佐以吏訴狀授之。諭之曰放皁歸耕。使給薪芻。京官皆然。不足爲過。小人不樂檢束。誣諂正人。汝自治之。佐叩首退。召吏示之狀。吏恐甚。佐曰上命我治

汝我姑容汝。但改行爲善。竟不治之。上聞之。喜曰。佐得大體矣。

磔千戶臧清於市。

有囚告佐累累枉人重罪不聽訴理者。上大怒。召楊士奇。楊榮諭曰。此必有重囚教之排佐。小人陷正人。不可不究治。遂命三法司鞫之。實千戶臧清殺一家無罪三人當死。代寫狀教之誣告。上曰。不誅之。佐何以行事。立命磔清於市。蓋上去惡佑善明決類此。

命列侯諸將帥師巡宣府。

十二月。太僕寺請遣官閱孳生馬。

上諭之曰。馬畜於民間。必寬民力而後可責其成效。國

家立法固有定規其孳生不及數者亦屢下令免償未嘗以馬傷民蓋農民終歲勤動以營衣食又有償馬之費甚可憫也爾等但率舊典以示勸懲民有貧難者宜寬恤之

庚戌宣德五年正月壬寅朔

太師英國公張輔少師等官蹇義夏原吉楊士奇楊榮金幼孜楊溥進 太宗 仁宗兩朝實錄賜白金綵幣羅衣鞍馬有差宴於中府

太宗實錄一百三十卷實訓一十五卷

仁宗實錄十卷實訓六卷

吏部奏考察天下朝覲官 上命老疾及鄙猥無能五十

五人爲民貪污二十五人發戍邊。

少保戶部尚書夏原吉卒贈太師諡忠靖。

原吉量寬弘人莫能測僚屬有善采納不遺有小失必掩護每曰人才難得一加譴責則自沮矣有郎污精微批懼甚乃入奏曰臣之罪也詔與易之過淮陰馬逸從者逐之原吉寄聲過客不應而詈之從者執以詣原吉笑而釋之隸有盜銀杯者獲不治仍予一杯以去有進士戲坐其車或以告原吉曰有志呂震爲子乞官上問之對曰震有守成功可與震嘗詆爲柔奸者也平江伯靖難時欲害之後薦總漕運二人心服焉尤樂薦引士類不使人知每朝廷行善政或歸稱之曰此天子



之明羣公之力。吾何與焉。凡奏章皆焚之。曰不可。章吾直也。

元宵節。令少師等官。蹇義。楊士奇。楊榮。觀燈于萬歲山。賜宴及鈔。

吏部奏選官。上與侍臣論前代官制。

上曰。省官安民之道。唐虞建官。惟百。夏商官倍。秦漢以下。視夏商官益增多。何也。侍臣對曰。時世不同也。上曰。唐虞三代事簡。民淳。不可比擬。唐太宗定內外官七百三十員。去古未遠。亦足爲法。侍臣對曰。然必君心清。則事簡。事簡則官可省。官省則民安矣。若國家多事。政務煩雜。小人倖進。冗食者多。欲百姓免於煩擾難矣。

上曰此誠確論。清心者省事之本。朕當勉之。

徙開平衛於獨石。

洪武三年李文忠克元上都。設開平衛守之。置驛八。東曰涼亭。泥河。賽峰。黃厓。四驛接大寧。古北口。西曰桓州。威虜。明安。隰寧。四驛接獨石。永樂初。大寧旣棄。而開平難守。至是遂城獨石。而徙開平衛于此。棄地蓋三百里矣。

二月。光祿寺廚役訴其寺官竊減外夷供給。通政司以聞。上命刑部侍郎施禮執而治之。

諭禮曰。光祿之弊不止此。自祖宗以來。飲食供給皆有定規。今擅自增減。應給之人率不得。凡得者率非應給。

之人惟虛立案牘以掩人目宜究治之。因顧侍臣曰。毋謂飲食細故。不干大體。昔華元殺羊享士。羊斟不與。遂致喪師。句踐投醪于江。與衆共飲。人心咸悅。遂成霸業。以此而論。所繫豈輕。

上以春和頒寬恤之令。

上御齋宮。召大學士楊士奇諭曰。吾欲下寬恤之令。今獨與爾商之。免災傷稅糧。當是首事。聞民間虧欠畜馬騾驢。所司追價甚迫。民計無出。亦甚艱難。部官坐視而不言。對曰。陛下聖念及此。生民之幸。各部惟知督責下民。以供公家。而不顧民心之離。故一切民瘼。蔽不以聞。今所當寬恤者。殆非止兩事。上曰。汝所知者。具言之。

對曰。百姓積年負欠薪芻及採辦買辦之物。所司責價甚急。此當寬貸。各處官田起科不一。而租額皆重。細民困乏。郡縣不以聞。蘇州尤甚。戶部固執。悉不與除豁。細民多有委棄逃徙者。此當量與減除。部符下郡縣採辦買辦諸物。但槩派徵。更無分別出產與否。非出產處百姓數十倍價買納。此請戒約該部。今後凡物只派產有之處。不許一槩均派。苦民年來刑獄冤濫者多。感召旱澇。恐由於此。請戒飭法司。敦用平恕。務求情實。今工匠之獎尤多。四方遠近。每戶不問幾丁。悉徵在京役於工者。什不一二。餘皆爲所管之人私役。不得營生。嗟怨溢路。此請命官巡察究治。及分豁戶丁之半放回。單丁者

皇明史稿卷一百一十五  
免老病無餘丁者除籍。又有平民本非業匠爲怨家誣引者。當審實除豁。南方運糧至此。人力甚艱。而倉廩無關防姦人盜竊。動輒數萬。前者就執後者復繼。恬無警畏。此請命風憲關防巡察。上歎曰。朝廷任六卿。但知苛責下民。而不能察姦清弊。有愧厚祿矣。爾所陳有益於朕。有益於民。此皆應行。命卽草勅。明日頒行。

命右春坊大學士王英侍講錢習禮主考會試天下舉人。撤棘取會試中式舉人陳詔等一百名。

命鎮朔大將軍陽武侯薛祿副總兵恭順侯吳克忠左右叅將武進伯朱冕奉化伯滕定率師巡邊。

乙未。

上奉

皇太后率

皇后謁

長陵

獻陵

車

駕發京師。

三月壬寅駐蹕陵下開平守將陳邊務數事。上舉其屯田守備可行者付所司行之。

上以皇太后命召少師等官蹇義楊士奇楊榮等見于行殿賜溫諭并白金紵絲表裏。

皇太后諭曰。皇帝數言卿等忠勤。今天下清寧。民生無事。是固祖宗福佑。亦惟卿等贊襄之功。

戊申。帝還京師。道中憫耒耜者。賜鈔六十錠。

上遙見耕者以數騎往視之。下馬從容詢其稼穡之事。因取所執耒耜三推。耕者初不知爲上也。旣而中官語之。乃驚躍羅拜。上顧侍臣曰。朕三舉耒。已不勝勞。况

常事此乎。人恒言勞苦莫如農信矣。命耕者隨至營人賜鈔六十錠已而道路所經農家悉賜鈔如之。

庚戌上御左順門召少師等官蹇義楊士奇楊榮等以御製耕夫記示之。

上曰朕昨謁陵還道昌平東郊見耕夫在田召而問之知人事艱難吏治得失因錄其語成篇今以示卿卿亦當體念不忘也。

成國公朱勇兵部尚書張本等奏外衛官軍從便事宜從之。

本等奏京師操備官軍其間有屬陝西緣邊鞏昌等衛及階州文縣千戶所者去京師甚遠每歲更代必俱遣

人促之方至。請以陝西內地衛所官軍與之代換。又山東內地衛所官軍有調沿海備倭者。沿海衛所却調京師操備。通州諸衛官軍發淮安運糧而直隸安慶諸衛乃赴京師操備。彼此不便。請行代換。

廷策會試中式舉人。賜林震、龔錡、林文進士及第。楊寧等三十五名進士出身。陳浩等六十二名同進士出身。

上臨軒發策畢。退御武英殿。謂翰林儒臣曰。朕於取士。不尚虛文。欲得忠鯁之士爲用。其間有若劉蕡、蘇轍輩。能直言抗論。庶幾所望。朕當顯庸之。於是賦策士歌以示諸讀卷官。是科廷試以三月之望。至今不改。

賜進士林震等宴于行在中軍都督府。



大學士楊士奇獨對。

上以 太后記憶 仁宗品題大臣語諭之。

上曰。前日陵上汝等謁 太后退。太后爲朕言。皇考往年在宮中談汝等姓名及行事甚熟。太后悉能記憶。其間才學孰優孰劣。孰肯任事。不任事。皆有譏評。言輔雖武臣而達大義。蹇重厚。小心。但多思而少斷。汝等持正言。不避忤意。議事之際。先帝數不樂汝。然終從汝。以不敗事。嘗有一二事之失。先帝甚悔。不從汝言。太后又謂朕曰。凡正直之言。爾不可以爲迂。而不從。謹之。謹之。士奇對曰。太后之盛德。仁宗皇帝之盛德也。願 陛下常奉 聖訓。

上御武英殿與侍臣論漢以下創業諸君。

侍臣有言漢高帝之大度有言唐太宗之英武有言宋太祖之仁厚不相上下者。上曰唐太宗宋太祖皆假借權力襲取天下。太宗懃德尤多。漢高帝及我太祖皇帝起布衣光明正大可比而同然漢高帝除秦苛政而禮文制度不修我太祖剪除羣雄革前元弊俗申明中國先王之教要爲過之侍臣皆叩首以爲至論。

增置嘉興府秀水嘉善桐鄉平湖四縣

交趾黎利篡陳暹而自立禮部侍郎李琦還利表請封朝臣請興師討之不許。

改江南民運爲兌運。

甲申進大學士楊榮少傳仍兼工部尚書謹身殿大學士  
懇辭大學士俸允之。

乙酉少傳楊士奇楊榮進重修玉牒賜宴文華殿。

上覽曰古人重世譜蓋皆正倫理篤恩義我國家宗族  
之盛皆由祖宗積德之所致又曰今於朕雖有親疎然  
所自實本於一人朕何敢忽士奇榮對曰周自后稷  
以來世積忠厚是以子孫衆維持王業歷年最遠國家  
世德隆厚故本支繁衍陛下又遠宗帝堯克明峻德  
以親九族將來盛福當過周家上領之曰然。

加陽武侯薛祿太保。

祿爲將勇智兼備紀律嚴明所過秋毫無犯善撫士卒。

臨陣赴敵。有進無退。故所向成功。築獨石。隆慶諸城。躬勤早暮。軍中肅然無擾。及巡邊至奇黃嶺。敗虜盡斬之。獲其家口孳畜。故有是命。

江西饑。賜璽書褒吉水胡有初。出穀一千五百石爲義民。復其家。遣行人勞之。

先是。掌吉水縣事知州柯暹。勸富民出穀賑濟。自有初爲倡。衆始胥效。出穀縣人賴焉。巡撫趙新上其事。上嘉之。

命工部尚書黃福總理淮北河南山東屯田。

淮安郡饑。山陽民羅振出穀一千二百石賑濟。命行人齎璽書旌爲義民。郡守表其所居堂曰旌義。

五月工匠有告內使韋宗盜官銅造鍍金器物其造過於御用器者上命付法司治之如律

陞禮部郎中况鍾御史何文淵等九員爲知府授以璽書假便宜從事馳驛之任

先是上聞除郡守由資格多不稱任命部院大臣各舉薦擢用之鍾以楊士奇薦知蘇州文淵以顧佐薦知温州及工部郎中莫愚知常州戶部郎中徐鑑知瓊州刑部員外陸本深知吉安行人司司正雷誠知延平皆出廷舉

命六科給事中自今但中官傳朕言釋有罪人並須覆奏始行

豹房勇士奏與民分居。上曰：「勇士在京師皆十餘年，安得今尚無居？此必民居寬好，欲舍而就彼此艱難，作一居，爾欲圖得之邪？」民何罪，爾何功？錦衣衛指揮王節奏：「此人今有居在城中。」上怒，命杖之一百，以一百斤枷號令警衆。召六科給事中諭曰：「此曹敢輕易犯法者，恃中官爲之救解。」

命追奪賊官誥勅。

六月，上於文華門御道屏左右，召大學士楊士奇諭以楊榮交通邊將，士奇申抹。上意乃解。

上曰：「楊榮家畜馬甚富，初聞之，張瑛未信，今察之皆得之邊將，榮交通邊將甚密，豈可任於親密之地？」對曰：「榮

與諸將交。蓋因永樂中扈從北征。太宗皇帝命掌兵馬之數。以此與諸將稔熟。今內閣諸臣知邊將之強弱才否。邊境之遠近險易。四夷之順逆委曲。惟榮一人知之。詳臣等皆所不及。方今用人之際。榮未可輒他用。且其在密地。凡制誥中予奪高下。皆稟上旨。又有臣等同議而行。豈榮所獨得專。且臣與同官亦嘗觀其廐馬三五疋有之。多亦不能畜。蓋芻菽未易辦。上曰。爾未知其家馬多。卽鬻於市。朕知之審矣。渠數請復永樂以來調衛軍官。朕詢兵部。言有罪調衛。洪武舊制無可復之理。朕固已疑之。對曰。此事亦未明。但其人尚有他長可取。幸姑容之。上曰。朕初嗣位。若但信榮言而不聽

蹇則士奇不得在此久矣。今士奇乃力佑榮乎。對曰。陛下容臣天地之恩也。臣今日亦願陛下推天地之量容榮。使之改過自效。此道在。陛下今日所當行。上意乃解。然自是不專任之矣。

兵部尚書張本奏甘肅寧夏大同宣府糧餉皆出民運。今各邊豐稔。請遣人與總兵鎮守官會議。彼處應用布帛等物。戶部運去。依價收糴。儲爲糧餉。以省民力。上命各處守將計議以聞。

武安伯鄭亨寧陽侯陳懋都督譚廣劉信言甘肅寧夏缺絲綿布絹綿花大同宣府缺布絹綿花茶鹽及農器犁鋤等物。如運至依時易換爲便。戶部遂請以折糧絲



綿布絹綿花及收買農器支在官茶鹽遣人運送陝西  
委叅政陳琰山西委叅政樊鎮口外委戶部郎中王良  
等專理其事。

南京副都御史吳訥致仕。

置萬全都指揮使司。

七月。上宴間與侍臣論商周得天下之道。

侍臣曰。湯武順天應人。除暴安民。功加于時。德垂後裔。  
所以天下歸之。傳之子孫。歷世久遠。上曰。天下所歸。  
蓋非偶然。唐虞之時。契敷五教。百姓親睦。后稷教民稼  
穡。天下享其利。至湯放桀。武王伐紂。遂有天下。誠以先  
世功德在民。篤生聖哲。用集大命。有不可辭者。于其子

孫享國長久。亦惟仁義道德。足以培植之也。

諭吏部甄別郡縣守令。

上謂侍臣曰。郡縣守令。所使安民者。若賢否混淆。無所激勸。則中才之士。皆流而忘返。吏部以進退爲職。亦未聞有所甄別。何也。因降勅申諭。

太保陽武侯薛祿卒。追封鄴國公。謚忠武。

撒馬兒罕貢蒼龍駒。禮部請賀。不許。

蒼龍者。天廐良馬也。產于西域。風鬃霧鬣。蒼然若雲。體質潔素。駿爽特異。按記所載。馬八尺曰龍。此蓋龍云。

八月己巳朔。日當食。陰雨不見。禮部尚書胡濙以爲卽同不食。請率羣臣賀。不許。

勅羣臣曰。古之人君所謹莫大于天戒。日食。又天戒之大者。傳不云乎。君子之過。如日月之食。過也。人皆見之。更也。人皆仰之。今以陰雨不見。得非朕昧於過而然歟。况離明照四方。陰雲所蔽有限。京師不見。四方必有見者。比之不食。天可欺歟。朕尚圖修省。以仰答天意。方賴爾羣臣匡其不逮。其止勿賀。

上罷朝。諭吏部尚書郭璉等訪廉潔士旌之。

上曰。東漢初。竇融保河西。以孔奮爲姑臧長。姑臧最富饒。奮獨以廉潔自守。衆皆笑之。謂其身處脂膏。不能自潤。光武知之。及融率官屬入朝。卽擢奮爲武都郡丞。以旌之。夫激揚清濁。爲治之道。使清濁無別。何以勸懲天

下。光武卽位未幾。舉卓茂。又舉孔奮。東漢多循良吏。蓋由此也。今天下未嘗無潔士。卿亦爲朕甄別以聞。朕當旌之。若人有善而上不知。則爲善者怠矣。

陞禮部左侍郎李琦爲湖廣左布政使。鴻臚寺卿徐永達爲湖廣按察使。刑科給事中方祖爲楚府左長史。

上與學士楊溥論得人才。在崇學校。慎選師儒。以責成之。上謂溥曰。民之休戚。係庶官之賢否。何術可盡得其人。溥對曰。嚴薦舉。精考課。不患不得。上曰。此恐非探本之論。若不素教預養。則人才已壞。徒嚴薦舉。精考課。譬猶濁其源而求其流之清。此豈可得。

南京江西道監察御史張楷劾奏刑部尚書趙玘侍郎俞

皇明大政錄 卷之十  
士吉曠職縱姦 命徵至京令右都御史胡槩兼理刑部  
事。

楷奏強盜吳福金者覆奏待決乃詐病死相驗瘞之其  
後復出強劫又有蘇州富民過達者安港巡檢司畱其  
財誣作強盜械送刑部而私賄獄官獄卒縊死于獄皆  
由玃等怠縱所致今該司官吏皆已逮問玃等亦當罪  
之。上覽奏怒曰縱有罪殺無罪豈可恕也。

遣吏部郎中趙新刑部郎中劉澤榮華工部郎中張琰禮  
部員外郎吳政等經理屯田。

先是尚書黃福言請以濟寧以北衛輝真定以南近河  
之地役軍民十萬人屯種積糧以充國用上命戶部

兵部議至是戶部郭資兵部張本言於緣河屯田直爲便宜。上從之。後本惑於人言竟不行。

九月初設巡撫陞吏部郎中趙新爲吏部右侍郎兵部郎中趙倫爲戶部左侍郎禮部員外郎吳政爲禮部右侍郎監察御史于謙爲兵部右侍郎刑部員外郎費弘爲刑部右侍郎越府長史周忱爲工部右侍郎巡撫各省兩畿總督稅糧。

新江西倫浙江政湖廣謙河南山西弘北直隸及山東忱南直隸蘇松等府。

上與侍臣論歷代運祚長短之由。

有獻歷代紀年圖者。

上覽旣顧侍臣曰唐之後不五

十年。天下五易主。生民之禍烈矣。周世宗英武觀其進取之畧。制治之心。足以平定天下。而亦享年不永。何也。侍臣對曰。帝王之興。自有天命。非人謀所及。上曰。國家創業垂統。貴有根本。三代以下。若漢高帝掃除秦苛。以濟蒼生。唐太宗革隋弊政。以致太平。其規模皆弘遠。所以傳之子孫皆久長。若後周之主。稱兵爲逆。劫掠京城。曾無匡濟之功。室家先覆。而世宗以養子繼之。欲其宗祀長久得乎。宋太祖陳橋之變。一號令之間。秋毫無犯。拯生民於淪溺。革叔季之兵禍。子孫享國與漢唐同久者。蓋有仁厚爲之根本。豈偶然哉。

甯山東曹縣知縣范希正罪。令復職。

希正在曹縣得民心。爲奸吏詐取民財。縱火延燒公廨。希正執之。械送京師。奸吏誣希正以他事。被逮。縣民八百餘人訴於通政司。言本縣累年正官有廉而無能者。有能而不廉者。希正廉能公勤。寬平正大。嚴約吏卒。愛恤人民。不一年間。政簡訟息。今爲奸吏所誣。此吏欺公玩法。蠹政害民。通邑所患。希正被逮之日。民人老少莫不流涕。如失慈母。若不爲伸冤。恐被誣陷。通政司以聞。時侍郎許廓過曹縣。耆民父老相率跪訴於廓。廓移文吏部。吏部亦具以聞。時刑部方奏希正不應徑解奸吏赴部。論以違制。上曰。聽民之言。希正君子。其徑解赴部。蓋欲急去惡耳。君子不當論其小過。卽遣復職以慰。



民心。奸吏令刑部盡法治之。希正蓋仲淹之後云。

嚴暄伏誅

暄初爲南京御史。數受賕。御史劉弘道奏黜之。暄賂左都御史劉觀得復職。右都御史顧佐劾御史之貪淫無恥者十餘人而暄爲之首。俱謫戍于遼東各衛。暄不受役。潛逃至京。仍造詞脅取財物。上命三法司鞠之。奏暄所犯應死。上命戮於市。

已亥詔巡近郊

上率六師巡邊。扈從之臣。命公侯伯都督皆行。文臣少師蹇義少傅楊士奇楊榮太子少保金幼孜禮部尚書胡濙工部尚書吳中吏部侍郎鄭誠戶部侍郎吳璽

兵部侍郎柴車刑部侍郎施禮都察院副都御史賈諒  
太常寺卿楊溥姚友直大理寺卿徐初通政司叅議劉  
芾光祿寺卿郝郁鴻臚寺卿楊善各率其屬行以士奇  
老疾特命肩輿從行。

十月丙子。車駕發京師。駐蹕玉河。

諭成國公朱勇曰。今農收雖畢。而禾稼在場。民間公私  
之費皆出于此。扈從官軍不許入民家有所求索。違者  
以重刑處之。其申令各營悉知之。

壬午。駐蹕雷家站。

召大學士楊士奇楊榮金幼孜楊溥問曰。唐太宗過此  
非征遼時乎。衆對曰然。上曰。太宗恃其英武而勤遠。

略此行所喪不少。帝王之鑒戒也。又問此山崩于順帝時。人率謂元亾之徵。卿等以爲何如。對曰。順帝自是亾國之主。雖山不崩。國亦亾。上曰。此言正合朕意。昔聖帝明王之世。未嘗無災異。大抵國之存亾。繫其君德之仁與不仁而已。

戊子。回鑾駐泥河。

壬辰。車駕至京師。

丙申。夜蓬星見。

十一月。廣西總兵山雲出師討慶遠蠻寇。平之。

直隸廣平大名等府縣奏久雨沒田稼無收。命戶部蠲其稅。

十二月諭吏部尚書郭璉留意訪人才。

上曰朕以用人之柄付卿。當爲朕擇才。昨郡守多缺。乃命廷臣共舉。古之人當斯任者。必勤於訪問。有得卽錄之。故官不乏才。呂蒙正之夾袋。虞允文之翹材。館錄是也。自今宜留意。

庚辰大雪。上示羣臣喜雪詩。羣臣進和章。擇其有警戒者別錄之。

巡撫浙江侍郎成均築捍海隄。

閏十二月文武羣臣以含譽星見上表賀。

二十一日夜含譽星見于九旂。大如彈丸。色黃白。光輝有彗。欽天監言占法含譽瑞星。爲君上施孝德興禮樂。

人民和悅夷狄奉化來朝之應於是羣臣忻悅忭舞皆以爲皇上聖德所感國家隆盛永遠之慶奉賀上表聖心謙抑推而弗居且賜璽書戒勵彌至。

江西按察司副使李綸謫戍遼東。

綸先爲御史與都御史劉觀子輻游。及受海鹽縣豪民金銀文綺出其殺人之罪至是事覺都察院以聞上命追所受贓及舊給勅命。

河南歸德州知州李志言請定協忠廟祝儀命禮部定張巡許遠居正雷萬春南霁雲賈賁姚閏配享有司以春秋仲月祭。

辛亥宣德六年正月丙寅朔兵部尚書張本卒。

本山東東阿人。洪武中自國子生擢江都知縣。靖難兵及境。本率耆老詣軍門朝。陞揚州知府。內難平。歷工部侍郎。以至兵部尚書。當時謂本一迎候間。遂獲終身富貴。至其戮高煦餘黨。則脅從者多不免云。

二月乙巳。萬壽聖節。勅賜少師蹇義少傅楊士奇楊榮禮部尚書胡濙御製詩。親宴內殿。

勅曰。予忝承大統。幸際小康。茲逢初度之辰。先朝甘雨夜降。時及霑足。迨旦天日開霽。人情歡悅。群臣慶賀之後。恭奉。母后皇太后上祝萬萬歲壽。聖情悅懌。予不勝慶幸。自惟非德。茂膺天眷。上怡宸慈。惟爾蹇義楊士奇楊榮胡濙四人。贊翼之功居多。予嘉不忘。茲復賜

宴內庭以表忠勤并賦詩一章以寓意云。

逮江西巡按御史陳祚下錦衣衛獄。

祚上疏勸上務帝王之實學真德秀大學衍義一書。凡聖賢之格言。古今之治道。無所不載。願於聽朝之暇。命儒臣講說。非有大故不可間歇。使知孰爲忠賢之可親。孰爲邪佞之可遠。古今若何而治亂。政事若何而得失。必能開廣聰明。增光德業。而忠賢以道義輔上德者。愈見於信任。邪佞以奇巧蕩正心者。自見於疎遠。天下之民受福無窮矣。上覽疏怒曰。蠻嚙朕不讀書。大學且不識。豈堪作皇帝乎。差官校逮繫至京。并其父母妻孥家屬悉下錦衣衛獄。禁錮者五年。時上方以博綜

經史自負。而祚之措辭。若上未嘗學問者。遂觸怒云。  
勅賜少師蹇義少傅楊士奇楊榮等御製招隱歌。

勅曰。朕惟賢者。致治之具。肆卽位以來。屢詔有司。舉德行才智之士。將與共圖治道。然林泉巖谷。必有遠隱。而不輕出者。朕夙夜念之。不能已也。夫枉已求售。非志士之本心。而潔身獨善。豈聖賢之中道。故嘗作招隱之歌。欲使幽遠之賢。皆明朕志。庶幾翻然有奮起者。蓋昔人嘗賦招隱矣。彼其有激。欲與俱去。遞世遺人。一己之私。朕之所懷。天下之公。題雖同而志則異。觀者亦亮予之志焉耳。卿等爲國重臣。同朕忻戚宴樂之暇。持示觀之。夫舉賢爲國。人臣之忠。其必有以勉副斯意。勿徒視爲。



空言可也。

賜侍臣喜雨詩。

勅曰國家所重者農事也。茲值萬物發育之時。甘雨露足秋成之望。實肇於此。予心喜悅。特出內膳以宴卿等。并賦詩一章賜之。尚益勵翼予躬。以共亮天功云。

令北直隸地方比照洪武年間山東河南事例。民間新開荒田。不問多寡。永不起科。

先是戶部官奏。查得洪武二十八年。本部節該欽奉聖旨。百姓供給繁勞。已有年矣。山東河南人民。除已入額田地。照舊征科外。新開荒的田地。不問多寡。永遠不要起科。有氣力的儘他種。欽此。今照北京八府供給尤

多。繁勞尤甚。乞要比例一節。奉 聖旨。准令照例。

趙儼伏誅。

三月。上御武英殿。與侍臣論井田不必行。

上問侍臣曰。古之井田。最爲善政。後世何以終不能行。侍臣對曰。自秦開阡陌。富強者得以兼并。遂致因循。上曰。朕惟爲國養民。在有實惠。誠能省徭役。薄征歛。重本抑末。便是養民。亦何必拘于古法。

乙巳。上御文華殿。少傅楊榮進講平天下章。學士王直進講生財有大道章。上剖析其義。諭之。

上曰。治天下國家。不可無財用。即如生之者衆。四語行之。不必暴征橫歛。而國用有餘矣。又曰。秦誓曲盡君子。

小人情狀。人君審乎此。則好惡用舍當矣。後世若漢唐中葉。小人倖位。妨賢病國。卒爲厲民。此聖賢之言。豈非龜鑑歟。

四月。有星孛於東井。

五月。遣兵部侍郎柴車經理山西屯田。

時巡按御史張勗言。大同地平曠。所種粟麥有收。多爲軍官據占。小民日困。乞遣官按視。占耕者分與軍民兩便。上命車及御史一人往理之。

溧陽妖人 伏誅

命四川總兵都督陳懷移鎮松藩。

六月。遣禮部右侍郎章敞諭黎利權署安南國事。

七月 帝幸少傅 士奇宅。士奇勸 上慎微行。

上入門立月中。士奇俯伏言。陛下柰何以宗廟社稷之身而自輕。擾擾塵埃昏暗。誰識至尊。萬一或有識者。變起倉卒。何以備之。上笑曰。思見卿一言。故來耳。遂屏左右語。竟。顧謂士奇曰。此居且敝。當爲爾葺理。士奇叩頭懇辭曰。陛下宮殿未暇。臣必不敢當。且 車駕今夕俯臨。外間明日必有知者。萬萬自此慎出事。變不測當慮也。 駕還宮。明日遣太監范弘密問。 車駕幸臨曷不謝。對曰。至尊夜出。愚臣迄今中心惴慄未已。豈敢言謝。又明日遣弘問曰。今天下寧靜。上時一微行。何足過慮。堯不微行乎。對曰。陛下尊居九重。恩澤

豈能遍洽幽隱。萬一有寃夫。怨卒。窺伺竊發。誠不可無慮。後旬餘。錦衣衛獲二盜。蓋盜嘗殺人。官捕之急。遂私結約。候車駕之玉泉寺。挾弓矢。伏道邊林莽中。作亂時有捕盜校尉。亦變服如盜。入盜羣。不疑。以其謀告之。遂爲所獲。上旣誅二盜。歎曰。士奇言不虛。卽日遣范太監。賜白金文綺。士奇明旦入謝。上諭以盜謀。且曰。愛朕莫如汝。自今如汝言。不復微行。士奇叩首。蓋大臣中先有導。上以天下平。寧可微行。而生日得賜鈔及馬者。故至是有愛朕莫如汝之說。

賜輔臣蹇義楊士奇楊榮等御製幽風圖詩。

上閱內庫書畫。得元趙孟頫所繪幽風圖。因賦長詩一

章召輔臣示之曰。幽風周公陳后稷公劉致王業之由。與民事早晚之宜。以告成王。使知稼穡艱難。萬世人君。皆當知此。朕覽斯圖爲賦詩。欲揭于便殿之壁。朝夕在目。有所儆勵。爾其書于圖之右。

八月常州知府莫愚奏公差官倚勢作威。乞加禁止。從之。愚奏守令親民之官。而黜陟臧否出自朝廷。邇來公朝官倚勢作威。是非顛倒。以廉謹者爲貪污。以諛佞者爲正直。乞加禁止。庶善有勸。惡有懲。上命吏部公差官有如此者。指名陳奏處置。

忠勇王金忠卒。

初名也。先土干。元太保不花六世孫。自永樂二十一年。

以其部屬來歸。太宗嘉之，封忠勇王，賜姓名金忠宣。德三年，扈從巡邊，至會州遇虜，忠奮勇當先，有斬馘功。四年，陞太保，其卒也。上甚悼之，賜祭葬。

九月，命戶部令崇國寺亟以果園地還宛平民。

初，民以地施寺，請蠲其稅。上曰：「民地衣食之資，乃以施僧，且求免稅，甚無謂。」令亟以還民。

熒惑犯南斗。

十月丙午，車駕巡近郊。

庚戌還京。

都督陳懷等率兵討松潘寇，平之。戶部定官軍兌運民糧加耗則例。

河南知府李驥奏伊王非禮陷辱。上致書諭王宜謹守祖法。勿信讒邪。府中承奉長史典儀悉械送京師治之。驥奏伊王居國。屢有非禮之求。臣不敢曲從。府中內官官校害百姓者。臣到任稍爲禁戢。自此王府含怒。今年冬至。臣以四更往王府陪班行禮。適初唱班。臣已就列。王以爲遲。執繫儀衛司獄。次日始釋。緣王府自前遇節行禮。未嘗有在四更者。臣蒙恩守土。遭王摧辱。不敢不奏。上謂都御史顧佐等曰。朝臣于朝廷大朝賀。皆昧爽之際。未嘗以四更行禮。此必王府讒邪小人教王辱知府之計。

北京新作禮部成。命大學士楊士奇撰碑文。



十一月安南黎利遣頭目何栗等陳情謝罪貢方物栗等奏請求封上納之

降刑科給事中李芳爲浙江海鹽縣丞

上每朝退御便殿與大臣議事芳直前言洪武中百官朝退凡大臣奏事必給事二人與之俱所以防弊上顧謂侍臣曰芳言是芳退輒自矜每見百司所爲事少不如意卽詣上前言之衆皆側目至是上亦惡其訐故有是命

唐受伏誅

巡撫江西吏部右侍郎趙新建議以漕淮之舟載江西之粟兵農兩利從之

勅賜少師等官蹇義楊士奇楊榮等御製喜雪歌。士奇等  
恭和歌以進。

勅曰臘後五日之夜大雪。迨旦而霽。蓋豐年之祥也。因  
作喜雪之歌。與羣臣同樂。已命光祿賜宴。其悉醉而歸。  
袁琦伏誅。

大學士金幼孜卒。贈少保。謚文靖。

幼孜簡易沉默。論事必正。眷遇雖隆。而自處益謙。臨終。  
家人屬求恩澤於子。正色曰。君子所恥。

壬子。宣德七年。正月辛酉朔。日食。

乙亥。召輔臣蹇義楊士奇楊榮等觀燈于內苑。賜御製小  
重山詞。

詞曰萬國寒消春又來。曠曠初日暖。照樓臺。滿城簫鼓沸如雷。昇平世。處處倒樽罍。○花木舊時栽。東風吹淺綠。轉根荑。夜來星彩煥三階。徵符應海宇。詠康哉。

少詹事兼翰林侍讀學士曾棨卒。贈禮部左侍郎。諡襄敏。棨江西永豐人。永樂甲申廷對。成祖親批貫通經史。識達天人。有講習之學。有忠愛之誠。擢魁天下。昭我文明。尚資啓沃。惟良顯哉。授修撰。會修永樂大典。爲副總裁。上一日召諸才俊賦天馬海青歌。棨先成。詞氣豪宏。上深嘉歎。屢進侍讀。至今官侍。上東宮。與修兩朝實錄。日直文淵閣。因疾作。上命醫往治。不起。二月。命工部右侍郎羅汝敬總督陝西屯餉河渠事。

上召少傅楊士奇論寬恤事。命同禮部尚書胡濙密議進呈行之。

二十八日。上召士奇至文華殿。曰。憶五年二月。共爾南齋。官論寬恤事。今兩閱歲矣。民事不又有可恤者乎。對曰。誠有之。只五年官田減租額一事。聖恩已下。墾書戶部格而不行。至今仍舊額追徵小民。含冤不已。

上怒曰。戶部可罪也。對曰。此循習之弊。永樂末年。多如此。往年高煦反。以夏原吉爲奸臣之首。正指此事爲說。上怒稍解。曰。今欲再下勅寬恤。必舉此爲第一事。却於其末增云。中外該管官司。不許故違。上又曰。如再格不行。朕必罪之。不恕。汝試言今日之事。當寬恤者。士奇

對所在官司不能容逃民則相結爲非願得恩旨下有司凡逃民願歸鄉者令郡縣用心撫恤優免差徭不願歸者聽於所在附籍爲民官給空閑田廬處之免差役二年庶以安其危亦弭患于未萌又言各處課程先因鈔法不通加倍其額徵納蓋一時之權今鈔頗流通宜量減倍徵之額又言天下課程皆納鈔惟湖廣廣西浙江商稅魚課舊例皆納銀民不勝弊請裁爲一例又言田里小民之不安皆原有司之貪污暴虐請令風憲考察奏罷又言方面郡守皆是要職吏部往往循資格陞受不免愚良混進請令吏部自今方面郡守有缺令京官三品以上及布政按察薦舉務取廉公謹厚識大

體能爲國爲民者。仍屬吏部審其所保。果可用。然後奏聞。量授以官。後犯賊罪。併坐舉者。又請令法司凡保舉授官。有人指告其罪者。必先問取干証明白。然後奏聞。請旨提對。庶幾不爲小人誣陷。又言年來吏員大冗。其間多有昏昧愚劣。不通文理。今後請令六部都察院翰林院會考選用。又言今軍民中豈無文學才行卓然出衆。及有智謀材勇精于武略者。請令群臣詢察舉保選用。又言唐虞之世。罰弗及嗣。今極刑之家。有賢子弟。例不許進用。上嘉納之。士奇請更得一人論此事。庶幾可以推廣聖澤。上曰。胡濙謹厚。汝與之密議。就錄稿進來。於是士奇等議增十數事。通錄進呈。上悅。

三月庚申朔。頒寬恤詔于天下。

上出御製猗蘭操及四言招隱詩。賜諸大臣。

上旣下詔求賢。復出御製示大臣。其猗蘭操曰。蘭生幽谷兮。曄曄其芳。賢人在野兮。其道則光。嗟蘭之戔與衆。草爲伍於乎賢人兮。女其子輔。招隱詩曰。天之生賢。道蘊厥身。幼學壯行。致君澤民。伊傳孔孟。皆古君子。孜孜行道。未嘗忘世。秦漢之衰。以退爲賢。絕類離倫。豈非違天。嗟哉若人。於身奚補。區區百年。草木同腐。予嗣祖宗。統臨萬邦。求賢圖治。宵旰皇皇。羣才偕來。布列在位。道行身尊。百世之貴。緬彼山林。豈無遐遺。往而不來。悠悠我思。漱石枕流。遠隱高蹤。雖逸其身。而悖於道。卷阿之

詩梧桐鳳凰爾其幡然予將爾揚

諭文武群臣今後天下司府官有缺令在京三品以上官保舉各處有文學才行出衆之士自二十五歲以上令所在有司及布按二司堂上官連名保舉赴京吏部審其所保具名奏聞量授以職後犯贓罪併罪舉者

上御左順門諭禮部尚書胡濙等今減租之令不可廢格上曰朕昨以官田賦重百姓苦之詔減十之三以蘇民力嘗聞外間有言朝廷每下詔蠲租戶部皆不行甚者文移戒約有司有勿以詔書爲辭之語若果然則是廢格詔令壅遏恩澤其咎若何今減租之令務在必行卿等當體朕意



命禮部試驗大通關提舉司吏文中其文可取命復舉人候下科會試。

中自陳臣廣東瓊州府昌化縣學生永樂二十一年鄉試中式因病未及會試繼丁母憂宣德六年八月至部以違限充吏切思海外之人本圖光顯今乃論謫爲吏伏望聖恩矜念上憐之

四月詔募商輸粟塞下

五月復開平涼府開城縣迭烈孫道路

先是陝西叅政楊善言西安諸府州歲運糧餉赴甘州涼州山丹永昌諸衛皆經平涼府隆德縣六盤山暨磴嶺山澗陡絕人力艱難開城縣舊有路徑達迭烈孫黃

河平坦徑直抵甘州諸衛近五百餘里洪武中官制渡船平涼撥軍操濟人以爲便旣乃罷之今請如舊開通以利民上命陝西三司覈實至是皆以爲宜仍命布政司給官錢造八舟平涼鞏昌二府擇善水者操之每舟十一人俱隸迭烈孫巡檢司

太原忻州民武煥家馬生一駒鹿耳牛尾玉面瓊蹄肉文破體如麟巡撫都御史于謙會同巡按三司視之咸謂其爲龍馬興而進之禮部胡濙請偕羣臣上表賀不許

上曰二三年水旱告災者踵至朕方旦夕憂勵一獸之微何救民飢而欲表賀其止之

上御便殿觀宋史與侍臣論宋用小人而亡

上曰宋有國三百餘年。武事終於不振何也。侍臣對曰。宋太祖太宗初皆以兵平海內。其子孫率流於弱。致武備不飭。上曰。宋之君誠失之弱。將帥雖才。亦不得展。蓋爲小人所壞。大抵宋之亡。柄用小人之過也。

六月巡按湖廣御史朱鑑言。乞令府州縣修倉廩。謹儲積。紓貸以時。從布按二司及巡按御史糾察。上命戶部行之。

鑑言。洪武間。各府州縣皆置東西南北四倉。以貯官穀。多者萬餘石。少者四五千石。倉設富民守之。遇有水旱。飢饉。以貸貧民。今各處有司。以爲不急之務。倉廩廢弛。贖穀罰金。掩爲已有。深負朝廷仁民之意。上諭戶部。

曰此祖宗良法美意由守令不得人遂致廢弛其如御史言違者從按察司監察御史劾奏

上親製翰林院銘

七月上賜羣臣御製祖德詩

上序曰昔者胡元之季上天厭之眷求聖德俾作民主我仁祖皇帝有純粹之性誠一之德蘊至德而弗矜篤大義而不銜體仁而養和履醇而抱潔循乎自然安乎大順蓋動與天游靜與道俱易所謂大人魯論所謂至德者也用集天命大開厥祥篤生我太祖皇帝其仁如天其智如神道冠百王德侔五帝汎掃六合綏寧萬邦正天紀立人極詩書禮樂之華典章法度之懿超

越隆古矣。皇祖太宗皇帝以大德承大統，神武赫著，聖仁弘施，近悅遠來，內安外服，茂勲洪烈，允光于前。皇考仁宗皇帝丕宣大猷，恢張美化，仁恩惠澤，益廣益深。是以普天之下，莫不尊親，同心愛戴，至于今日，顧予菲薄，克遂承繼，揆度所自，厥有明徵，實由仁祖皇帝源本之隆。肆太祖皇帝開創之大，而我皇祖皇考得以恢廓而維持之，萬世之業所由定也。列聖之德與天爲一，謹序述爲詩九章，以詔後世。

上以御製織婦詞一篇示羣臣。

上曰：朕非好爲詞章，昔真西山有言：農桑衣食之本，爲君者當詔儒臣以農夫織婦耕蚕勤勞之狀，作爲詩歌。

使人誦于前。又繪以圖。揭於宮掖。布於戚里。使皆知民事之艱。衣食之所自。朕所以賦此也。

### 置呂梁漕渠石閘

初陳瑄以呂梁上洪地眇水急。漕舟難行。奏准令民於舊洪西岸鑿渠深二尺闊五丈。有奇。夏秋有水。可以行舟。至是復欲深鑿。置石閘二。時其啓閉以節水。庶幾往來無虞。事聞。命附近軍衛及山東布政司量發民工。夫匠協力成之。

### 上御武英殿與侍臣論漢唐開創輔臣

侍臣對曰。蕭曹房杜皆常才。亦當時無過之者。今天下之廣。未必無才。但係于遭際何如耳。上曰。然。如三老

董公及泰山道士徐洪客皆不見用。而蕭曹房杜成功。誠哉人才遭際爲難也。

蘇州知府況鍾言公差御史逆越禮分。輒求小過。伏乞禁約。上命禮部同翰林院會議申明。

鍾言憲綱有云。御史所至之處。博採諸司官吏廉勤公謹者薦之。汙濫奸佞者威之。糾之。勸懲得體。人自畏服。至於御史與在官相見。禮儀及凡迎詔勅。詣學校皆有。一定禮制。比來各處公差御史多有逆越禮分。各府知府亦自顧闕葺貪暴。畏其糾劾。諂諛拜跪。甘受詈辱。間有奉法持已不肯阿屈者。御史輒求小過。擅作威福。使賢良不安于位。而邪佞得以苟全。伏乞禁約。

上登萬歲山坐廣寒殿與儒臣論元興亡

上諭之曰此元之故都也世祖知人善任使信任儒術愛養民力故能混一區宇以成帝業再傳至武宗元政稍變更仁宗繼之恭儉愛人卽位之初興學校勵風憲清中書其孜孜爲治一遵世祖之法足爲賢君英宗果於殺戮奸黨畏徇遂構大變泰定以後皆享祚不久至順帝在位既久肆意荒淫怠於政事紀綱法度蕩然遂致失國使順帝能恭儉長守世祖仁宗之法天下豈爲我祖宗所有又曰茲山茲宇順帝存日宴游者也豈不可感侍臣叩首曰桀紂之跡殷周之鑒也上曰然

平江伯陳瑄請修祀靈應侯廟從之



八月諭少傅楊士奇降勅責吏部都察院考察在外方面及郡縣官不才者罷黜之。

諭曰。今春命三品以上者舉方面郡守。後又出舊作招隱倚闌之詩以示意。已踰半歲都不舉一人。近因卿二人舉黎恬等。朕思今天下之廣。豈無人才。但群臣不以國家生民爲心。又兼以忌嫉。注念故往往視朕言爲虛。文吏部怠忽至此。其降勅責之。

陞吏部郎中魏驥爲南京太常寺少卿。交趾南靈州黎恬爲右諭德。福建建安縣學教諭楊壽夫。山東臨清縣學教諭彭琉爲翰林編修。

四人皆京官三品以上所薦。

巡撫侍郎周忱奏置蘇松等府濟農水次等倉從之  
釋故城縣丞陳銘復任

先是上聞內官內使差遣在外者多貪縱爲民害以太監劉寧清謹忠良命同御史馳往各處盡收所差內官資橐并其人解京師既還道經故城縣丞陳銘聞有內官至不問所從來輒奮前棒寧而手擊之御史遂奏丞無狀逮至上曰丞固可罪朕以其一時偏於所惡昧於所聞且宥之侍臣或言銘酗酒擅擊朝使陛下縱赦之亦不可使復任上曰朕既釋之彼當因此知改過也

命贊理漕運戶部尚書黃福掌南京戶部事

上在官中。覽黃福贊理漕運便民數事。出其章示楊士奇。且諭曰。福所言皆智慮深遠。可行。今六卿中。其誰之倫。對曰。福受知太祖皇帝。最先大用。其爲人正直明果。一志於國家生民。今六卿中。鮮及之。福今年七十矣。諸後進少年。高坐中堂。理政事。享安佚。出入輿馬。騁從揚揚。福四朝舊人。乃朝暮奔走道路。勞瘁不已。殆非國家所以優老敬賢之道。上曰。非汝不聞此言。吾嘗欲得一老成忠直之人。處南京根本之地。緩急可倚。今以命福。豈不誠當。士奇對曰。福必不負。陛下任使。明白。上命吏部改福南京戶部尚書。中外聞者皆悅。

順天府奏鄉試取中式舉人宋雍等。

應天府奏鄉試取中式舉人

等八十名

九月御史包孝德給事中虞祥奏順天府鄉試關防不嚴致有詐冒請治提調府尹李庸監試官御史梁廣成等罪上命姑宥之

上顧侍臣曰科舉求賢國家重事於此而不用心他事可知矣御史給事中所劾本不可宥但念斯事因庸覺察不然則奸弊不露矣

陞山雲爲都督同知仍鎮守廣西

蘇州府知府況鍾上言乞遣大臣整理水患命侍郎周忱與鍾計工力多寡難易以聞

鍾言蘇松嘉湖之地其湖有六曰太湖白傷山白楊城

曰昆承曰沙漠曰南湖聯屬廣袤凡三千餘里其水東南出嘉定吳淞江東出崑山劉家港東北出常熟白茆港永樂初朝廷命尚書夏原吉督理疏濬水不爲患民獲有秋年久淤塞不通一遇久雨遂成巨浸田皆沒溺乞仍遣大臣督各府縣官於農隙時發民疏濬則一方永賴矣。

直隸隆慶衛指揮同知袁泰等奏本衛缺指揮使請任本衛指揮同知李景不從

上召武臣謂之曰爵賞當自朝廷景若有功朕豈吝此唐自中世以來威權不振河北將帥皆中軍所立此輩猶欲效之耶爲大臣者但當竭忠盡力爲國立功不患

不富貴。勿得越制以干憲章。群臣皆頓首。

十月。八百大甸土官宣慰司刁之雅遣人貢方物。且云。波勒嘗以土酋土雅之兵來寇。殺人掠財。乞發兵討之。不許。上謂侍臣曰。聞八百去雲南五千餘里。荒服之地也。波勒土酋土雅皆未嘗歸化。豈能勞國之人爲遠夷役乎。且夷性獷悍。必兩有未善。豈皆波勒之過。宜降勅慰諭。使敦睦隣好。保境安民。

十一月。南番白葛達國人貢。

西境天方國及默德那國各遣使來朝貢。

天方國舊名天堂。默德那國卽回回祖國也。

十二月。詔修祖陵。孝陵。

癸丑宣德八年正月乙卯朔。

丁卯祀天地于南郊。命少傅楊士奇、楊榮分獻。

自祖宗以來皆朝百官後乃行。至是上先日諭禮官明日早行不視朝。既至南郊躬詣神廚。凡諸事祭物一閱視。召太常寺諭之曰：祭物固應精潔，典祭之官以虔誠爲本。宜秉寅清以率百官執事，分毫無慢。庶幾神明歆享之道。晚御齋宮，旗手衛奏請如故事放烟火。不從。顧謂侍臣曰：特早來不視朝之故，蓋一心對越無暇他及。今又暇觀烟火乎？是晚陰雲四合，至夕雨雪。行禮之際雲歛風靜，星月朗霽，天氣融和，助祭執事咸中禮度。

己巳上元之夕。上奉侍 聖母皇太后觀燈中宮。皇太子咸侍奉觴上壽。

初張燈內苑製作精麗鋪張弘大輝煥繁盛非言語所能形容。

辛未勅羣臣往觀燈賜宴苑中。

壬申命文武大臣以四夷朝貢之使觀燈仍賜宴苑中。悉賜京城內外之民往觀。

少傅楊士奇進太平 聖德詩十章 上嘉納之。

勅南京守備襄城伯李隆同巡撫侍郎周忱總督南京各衛所屯田較其所入之數以充軍倉必使耕種以時毋令下人搔擾。



命致仕少保大學士黃淮與英國公張輔及蹇義楊士奇等十人同遊西苑賜宴于萬歲山之麓。

淮蒙恩賜以一品禮祭葬其父。赴闕謝恩。故預焉。

時天下朝覲官在京。上問吏部尚書郭璉曰。先所任九人爲知府。亦有來者乎。璉以文淵等七名應。乃召入便殿。命中使傳語獎勞。

賜宴溫州知府何文淵等七人于廷。以御製招隱詩賜之。二月。命少保黃淮少詹事王直主考會試天下舉人。賜宴于禮部。

撤棘取會試中式舉人劉哲等一百名。

三月。廷策會試中式舉人。賜曹鼐趙恢鍾復進士及第。梁

宏等三十五名進士出身梁亨等六十一名同進士出身  
龔真定晉寧人初舉鄉試中乙榜授代州學正辭年少  
不堪爲人師願改別職得泰和典史劇邑政繁處之裕  
如公暇益進學不倦久之以督部工匠至京疏乞試中  
會試第二廷試策問義禹河洛象數龔對稱旨上親  
擢爲第一授翰林院修撰爲人明敏疏通楊士奇愛重  
之薦入經筵不數年入閣預政是科得李賢爲名臣  
賜宴進士曹鼐等于禮部

以後循以爲例

少保黃淮辭歸上宴餞之于西苑太液池親灑宸翰製  
詩送之仍賜金織衣一襲

命禮部尚書胡濙同大學士楊士奇楊榮選進士李紹劉益徐埕等六人改爲庶吉士。命侍讀學士王直訓督之。選下第舉人王鑑等二十四人俱賜冠帶給訓導俸送國子監肄業。

四月命成國公朱勇豐城侯李賢新建伯李玉少師蹇義少傅楊士奇楊榮尚書郭璉胡濙吳中侍郎蔣驥少詹事王英王直學士李時勉錢習禮遊西苑。士奇榮撰詩以進。首至新構圓通殿。臨太液池。池之中多嘉魚。殿之左右多名花。東去十步又有嘉蔬奇果。皇上每躬自採摘以奉聖母。皇太后甘旨。繼至清暑殿。此亦奉聖母遊覽之所。規制宏敞。花木森鬱。旣而登萬歲山。池水環

之如壁磴道逶迤。奇石森列。千形萬狀。不可備述。勅賜羣臣內庖酒饌。

畿內及河南山東山西並奏自春及夏雨澤不降。人民飢窘。頒寬恤之詔賑恤之。

詔二十一條。蠲免拖欠各項歲派課程。及今年夏稅差役並失班人匠免罰工。軍民乏食者所在官司驗口賑濟。

五月四川盜起。副都御史賈諒率兵討平之。

六月。上以天久不雨。禱祀未應。憂之。作閔旱之詩。示羣臣。

命平蠻將軍都督方政副總兵蔣貴鎮守松藩。

七月。上與侍臣論漢高帝唐太宗優劣。

侍臣有盛稱唐太宗英武過高帝者。上曰。太宗才盛。高帝義盛。高帝不事詩書。而大義瞭然。太宗文雅足稱。而大義未明。

置武驤騰驤四衛。

少傅楊榮滿三載。賜宴禮部。降勅褒諭。

八月。熒惑犯南斗。

江西吉安知府陳本深言。廬陵舊有忠節祠。祀鄉先賢歐陽修。周必大。楊邦乂。胡銓。楊萬里。文天祥。乞舉行從之。

上諭禮部曰。褒崇忠節。以正人心。厚風化。此國家先務。其從所言。令有司春秋祭祀。仍以時修葺祠宇。

閏八月命南京戶部尚書黃福兼掌兵部事。  
彗出天倉。

甲寅南海外諸番國各獻麒麟凡四少傅楊士奇等進頌  
戊午夕景星見天門少傅楊士奇等進頌。

青赤二色雲氣而有三星各黃色益近而聚既而天宇  
澄朗星大如半月狀光彩煥然助月爲明萬姓瞻睹忻  
躍舞蹈士奇上言西北者天門之位也稽之載籍云四  
氣和爲景星又云天子至孝任賢使能法令清明制作  
合天四海懽悅則景星見又云德至于天則景星見于  
天門凡此皆陛下聖德之實著者也上謙不自居  
降賜璽書推功天地宗廟而勵羣臣勿怙以驕咸敬自

修庶答天貺

九月詔各布政司按察司府州縣官連名保舉賢良方正一人起送吏部量才擢官

令天下生員年四十五以上者考選送國子監

時言者以士子借學校者多衰老不得及時進用遂有此令增開貢例以後累累行之

十月丙寅平江伯陳瑄卒諡恭襄

瑄初督海運會通河既浚命專理河道自儀真至北通州四千里漕運事宜皆其經營創設疏清江浦引水由管家湖入島陳口以免淮河風濤之患浚瓜洲儀真二壩潮港之漚鑿呂梁徐州二洪以平水勢築沛縣刁陽

湖濟寧南旺湖長堤開泰州白塔河以通大江築高郵湖堤內鑿渠亘四十里以通舟自淮至臨清相水勢高下建閘四十有七以時啓閉緣河堤種樹鑿井以便夏月行者皆舟楫永遠通行之利凡於事慮之周而爲之果初歲運二百萬石後增至五百萬石國用以饒

十一月賜朝鮮國王李禔五經四書大全諸書

詔禮部合丁未庚戌癸丑三科進士御文華殿親試之拔其尤者鄭建等二十八人與修撰馬愉陳循林震曹鼐編修林文龔鉤鍾復趙恢評事張益同進學文淵閣賜御製詩勉之

其優禮給賜一循永樂甲申之例。



命少傅楊士奇楊榮試吏部引進在外庶官六十八人擇其優者知縣孔友諒進士胡端禎廖莊宋璉教諭黃純徐惟超訓導婁昇七人以聞令吏部改進士爲庶吉士與知縣教諭俱歷事六科以備用。

命右軍都督僉事方政王瑜督理漕運鎮守淮安。

巡撫南直隸工部侍郎周忱奏定濟農倉之法。上皆從之。於是令諸縣各設濟農倉擇縣官之廉公有威與民之賢者掌其籍司其出納每歲種時之際于中下二等戶內驗其種田多寡每家給與二石一齊給之秋成抵斗還官凡其條約俱忱親爲規畫俾之遵守明年江南又大旱令諸郡大發濟農米以賑貸而民不知飢。

十二月。太子太保戶部尚書致仕郭資卒。贈湯陰伯。謚忠襄。

令天下關津。但遇削髮之人。捕送原籍治罪如律。  
詔修南京宮殿。

日本國王源道義卒。遣使弔祭。

甲寅。宣德九年正月己卯朔。

丙戌大雨。上喜兆豐年。召輔臣蹇義楊士奇楊榮及六部都察院堂上官并議事在京巡撫侍郎周忱趙新宴于史館。

二月。開平守將奏邊務數事。上舉其可行者付所司行之。

上謂侍臣曰方今海內小康惟殘虜叛服不常古人制夷狄惟在守備若城堡堅固糧芻充足士卒精練哨瞭嚴謹彼亦何能爲患朕累以此戒飭邊將但慮其因循玩慢今春氣漸深正邊民耕種之時一或農事妨廢秋收無望仰給于轉輸則勞矣遂令邊將嚴謹備之

戶部員外郎羅通奏請乞減舊例令軍民人等赴開平種鹽從之

通奏凡運糧赴開平每軍運米一石又當以騎士護送計人馬資費率以二石七斗致一石令軍民人等有自願運米至開平中納鹽糧者乞將舊例二斗五升減作一斗五升若商一人納米五百石可當五百軍所運且

省行糧二百石。

南京刑部侍郎段民卒。

妖僧李臯謀反伏誅。

三月戊寅命百官朝皇太子于文華殿。

廣西總兵山雲奏交趾黎利已卒。長子狂妄。次子幼弱。姦臣黎問黎密構黨讎殺良民驚懼諒山府土官阮世寧七原州土官阮公庭各率家屬及部下三百餘人避難來歸。願于廣西龍州及太平府居住。上命聽隨便居住。旌廬陵縣民陳謙爲義民。

謙出穀一千二百石賑飢遣行人賫勅獎之。

上與侍臣論兩晉立國無本。

上曰晉武以開創之主不爲遠圖樹立失宜託付非才  
羌胡鮮卑雜處內郡而不能以時區處所以國禍方殷  
而戎寇遽至東晉僅能立國逆臣接迹朝政陵夷而猶  
延數世者亦有賢人爲之用也又曰古先帝王維持天  
下以禮教爲本兩晉風俗淫僻士習浮薄先王禮樂教  
化於是蕩然豈久安之道哉

四月瓦剌脫歡攻阿魯台殺之欲領部落人心不服乃立  
元之後脫脫不花爲主居沙漠之北哈喇噐等部皆應之  
禮部侍郎李琦還黎利子麟遣人告喪

五月遣使祭黎利

六月太常寺卿兼學士楊溥九年秩滿進禮部尚書仍兼

學士。

震大祀壇門。

七月，山西霍州學正曹端卒于官。

端字正夫，河南澠池人，潛心理學，日事著述，教人務躬行實踐，事父母，曲盡孝養。年荒，勸賑，一方賴以全活。在霍，學年久，士子服習教化，郡人薰炙，唯禮義是尚。後調蒲州，霍諸生上章懇留，從之。竟卒于霍。郡人如喪考妣，學者稱爲月川先生。

八月，瓦剌脫歡攻殺阿魯台，其子阿卜只俺來歸，以爲中府左都督。

甘肅守臣遣使獻龍馬，群臣請上表賀，勿受。

其耳額及頤及鬃尾皆肖龍而全體潔白如雪鬃毛層疊狀若波文蓋騰驤卓犖有躡雲追電之意氣聞諸獻者云其牧之池而池下有龍焉常有雲雨晦冥風雷交作於上蓋龍馬云勅賜羣臣觀之

大學士楊士奇進龍馬歌 納之

士奇云西北乾位也固天馬所自出而龍乾象也故又爲龍馬瑞牒云龍馬仁馬也應德而至又云龍馬太平之應也誠由 皇上仁恩義澤敷洽天下是以天降靈瑞以彰 皇上大德以垂太平之慶宜有詠歌協諸樂府以宣揚鴻烈於悠久

詔文武羣臣以九月巡邊

上臨朝諭曰武有七德保大安民其二也况天下旣安不可忘武今穡事旣成朝政多暇朕將親率六師以行邊塞申飭武備庶幾永保無虞羣臣皆頓首稱善

九月命禮部尚書張瑛仍直文淵閣尋卒

癸未車駕巡邊命文臣蹇義楊士奇楊榮胡濙吳中楊溥等扈從給內廐馬

乙酉車駕度居庸關

丙戌獵岔道

辛卯駐蹕宣府洗馬林

上駐蹕洗馬林晚御幄殿學士楊士奇楊榮等侍上問曰人君御世之權何者爲重榮等對曰命德討罪二



者是也。上曰：二者天下之公器，人君特主之耳。若舜舉十六相，誅四凶，而天下悅；此以天下之好惡爲好惡也。齊威王封卽墨大夫以萬家，而烹阿大夫，齊國大治。此不以左右之好惡爲好惡也。故爵賞刑罰至公無私，然後能服天下。士奇等咸叩首曰：誠如聖諭。

己亥大獵。

十月丙午，車駕還京。

命禮部侍郎章敞諭黎麟權署安南國事。

十一月甲戌朔，特賜少傅楊榮御製詩嘉褒。

詔工部鑄宣德通寶錢。

上與侍臣講周書畢，以周之王業及成康治效諭之。

侍臣曰成王卽政之初三叔挾武庚以叛周公以流言避居東都頑民不靖奄及淮夷煽亂成王得保武王之業亦不易也。上曰當時皆以爲周之不造及成王定奄平淮東土始寧罪人斯得而又天大雷電以風用彰周公之德成王迎公歸誅管蔡遷殷頑民而後王室安自是天下太平刑措四十餘年子孫歷年八百則知始之所以震撼者正天所以維持鞏固之也成王卒爲守成令主周召爲賢臣以永周家一代之基業豈偶然哉十二月瓦刺順寧王脫歡使臣昂克等朝貢陛辭命指揮康能等送之并賫勅諭脫歡不必獻玉璽。

諭曰王克紹爾先王之志遣人來朝進馬具見勤誠聞

殺阿魯台尤見王之克復世讎所云已得玉璽欲獻亦  
悉王意然觀前代傳世之久歷年之多皆不及此王既  
得之可自留用仍賜脫歡紵絲五十表裏答其貢獻云  
有僧自陳欲化緣修寺祝延聖壽上斥之

上謂侍臣曰人情莫不欲壽古之人君若商中宗高宗  
祖甲周文王皆享國綏遠其時豈有僧道豈有神仙之  
說秦皇漢武求神仙梁武帝宋徽宗崇僧道效驗可見  
矣世之人終不悟甚可歎

命監察御史分投巡視倉廩禁革奸弊

先是楊士奇言南方運糧至京人力甚艱而倉廩無關  
防奸人盜竊動輒千萬前者就執後者復繼恬無警畏

請命風憲關防巡察。上從之。於是定一員巡視在京倉。一員巡通州倉。一員巡視各處收草。一員巡視甲乙等庫。一員提督象牛羊等房錢糧。一員巡視光祿寺凡內外官員人等多支倉料及需索騷擾者皆令執奏。上御文華殿召大學士楊士奇等出御書洪範篇及御製序文示之。

諭曰。所論或未當。卿等當直言勿隱。士奇等對曰。聖論真得古人之精蘊。上曰。朕在宮中。雖寒暑不廢書冊。士奇等對曰。帝王勤學問。則宗社生民有賴矣。惟願陛下始終此心。上笑曰。卿等亦常須直言。

甲子。帝不豫。衛王瞻埏攝享太廟。

乙卯宣德十年正月癸酉朔。帝不豫。百官朝。太子于

文華

甲戌。帝崩于乾清宮。壽三十八。

時皇太子方九歲。祖母張太后取金符入內。浮議頗有欲立襄王之說。楊士奇、楊榮與英國公張輔入視臨畢。請見皇太子。卽叩首呼萬歲。羣臣亦呼萬歲。浮議乃息。

壬午。皇太子卽皇帝位。詔赦天下。以明年爲正統元年。詔條四十。皆大學士楊士奇代草。如天下一應課程及門攤等項。俱照洪武年間舊額徵。不許以鈔法爲由妄自增添。及取回差去買辦。開辦採捕各項內外官員蠲

免各監局并各衛門拖欠各色錢糧物料除豁各處荒田坍塌潮泊歲征尤切民弊。

上 大行皇帝尊謚曰憲天體道英明聖神欽文昭武寬仁純孝章皇帝廟號宣宗

少師吏部尚書蹇義卒。

上嗣位賜金幣是夕齋宿于公得疾以聞。上遣太監范弘以醫來視賜鈔萬緡明日弘偕衆醫來又明日疾革弘復來問所欲言對曰陛下初嗣大寶義獨寡祐不能效分寸裨益然大馬之誠所望于聖明者惟敬守成憲終始不渝耳言已而絕計聞上深悼歎。

丁亥命少傅楊榮相度山陵還奏稱旨。

二月壬子。上兩宮尊號。尊聖祖母皇太后張氏爲太皇太后。聖母皇后孫氏爲皇太后。封皇弟祁鈺爲郕王。詔赦天下。

頒詔二十一條

丁巳。太皇太后諭彭城伯張昇。都督張昇。尚其循禮度修恭儉。率子孫毋作過愆。自今惟朔望公朝。有政議悉勿預聞。

命禮部尚書兼學士楊溥仍直文淵閣。

釋御史陳祚于獄。復其官。

少傅楊士奇題請初卽位合行事宜。

一勅五府及兵部整肅軍政以壯國威。一勅南京戶部

尚書黃福叅贊軍務一勅淮安鎮守嚴加守備一分委  
文臣鎮守江西湖廣河南山東以防嘯聚一勅襄城伯  
李隆緝捕江盜一勅錦衣衛緝捕北京盜賊一勅陝西  
甘肅寧夏及宣大開平補給馬匹以防瓦剌入寇一勅  
兵部發回各衛操軍以便調用一勅都督沐昂贊輔黔  
國以馴蠻夷一戒緝事官校使平人少冤一令巡按考  
黜不職一選王府官以正輔王一放回在外取來樂工  
釋前鬱林知州林長懋于獄復其官

三月進士李賢上疏請徙京師韃官不報

疏言 帝王之道在保赤子黎民禽獸夷狄雖一視同  
仁其施也必由親及疎未有赤子不得其所而先養



禽獸者今京師韃官不下萬餘以俸言之指揮俸三十  
五石而實支一石韃官則實支十七石五斗是韃官一  
員當京官十七員半矣傳曰朝無倖位則食之者寡此  
豈倖位之比況夷狄人面獸心一旦有警其勢必不自  
安前代五胡之亂可不監哉乞斷自宸衷爲萬世計勅  
兵部漸次出之於外不惟省國家萬萬無益之費又可  
以消未萌之患

少傅楊士奇請早開經筵以進聖學

士奇一請預命吏禮部翰林院公同推舉講官一請先  
命禮部翰林院詳定禮儀一請望大皇太后太后  
陛下皆留心爲皇上慎選左右隨侍及使用之人如

或其人舉動輕佻。語言褻慢。立心行已不正者。皆宜早去之。

四月。因天久雨。水潦蝗蝻。勅諭吏部都察院考察在外。而按二司及府州縣官。不才者。照例發遣。有缺仍遵宣宗勅旨。舉保不許故違。有犯贓罪。連坐舉者。

五月。陞兵部右侍郎王驥爲本部尚書。

六月。戊申。奉宣宗葬景陵。命少傅楊榮護喪葬事。

命南京戶部尚書黃福叅贊南京軍務。加少保。

時楊士奇等言。上初嗣位。當肅軍政。飭邊防。南京根

本重地。雖有襄城伯李隆守備。宜令黃福叅贊永爲定制。

七月命司禮監太監王振偕文武大臣閱武于將臺振矯旨超陞隆慶右衛指揮僉事紀廣爲都指揮僉事

振山西大同人初侍上於東宮及卽位遂命掌司禮監寵信之每呼爲先生而不名所言無不從振遂擅權作威福時輔臣方議開經筵而振乃導上布武於是詔振偕諸大臣閱武將臺將臺在朝陽門外近郊集京營及諸衛武職試騎射而殿最之因紀廣常以衛卒守居庸者往投振門大見親暱遂奏廣第一超陞之蓋宦官專政柄制國命自此始

八月命平羌將軍寧陽侯陳懋鎮守甘肅  
順天府奏鄉試中式舉人鄒冕等名。

應天府奏鄉試中式舉人郭倫等八十名。

九月山陵畢勅修宣宗實錄命少傅楊士奇楊榮尚書

楊溥爲總裁

虜阿台朶兒只伯寇甘涼

命陳鎰爲右副都御史鎮守陝西兼督延寧兵備

以工部郎中徐晞爲兵部右侍郎鎮守甘肅

晞江陰人以吏員授繕工司都司歷工部郎中有巧佞

才外示廉厚心懷機械多以智術籠人又善結中官王

振至是假督工勞超陞之蓋小人附宦官得顯擢始此

吏部侍郎黃宗載陞南京吏部尚書

十月擢監察御史羅亨信爲僉都御史往甘涼莊浪等處

練兵備邊

十二月少傅楊士奇論激勸

士奇言旌一人之賢以勵衆人之功者古帝王治天下之要道也切見南京戶部尚書兼詹事黃福事太祖至今五十餘年在朝老臣惟此人最久清廉公直秉心端正上爲國家下爲生民中外之人皆知其賢近日已蒙聖旨令贊襄城伯機務南京係國家根本之地此人必能效誠又見浙江都指揮使許亨清廉公正老成忠厚一心爲國恤軍愛民浙江軍民深所愛服伏望聖恩特賜陞賞二人以勵衆人

皇明大政記卷之十